

“A duti quii che ‘i ha i CD co’ le mie canson”



by: *Aldo Tognon* - volume n. 3

...Gnissun sènte più incuo de ‘i mie CD canson,  
ma se le polarà vignì archiviae de garghe parte  
cu sà che un zorno, magari in sotovose,  
gargun turni a cantàne un ritornelo.

Me no’ sarè, ‘chè prima o dopo tòca, ma  
se de canson n’ he fàte quasi cinquanta,  
sia de laguna, amor e altro no’ dìgo,  
garguna de siguro restarà in mente.

Cussì tra diese, vinti o trenta ani,  
cô de moderno e computerizao ‘l Festival sarà,  
'nte 'l vecio archivio gargun 'ndarà sgrapiando  
e, 'tao 'l PiCì o 'l Aipod, el 'scolarà.

E sarà testi de paluo, cason, sieli e tramunti  
e valser, blues, pop-rock ma ninte tanghi...  
'che me piaveva i Bitle e i Roliston', Elvis o Vasco  
e i melodici italiani me fèva solo fresco.

E 'lora ... si, siguro i dizarà: “zè antichitae,  
zè strafanici, zè storie ormai passae...  
ne 'vemo zà sintie de 'ste canson a milanta...  
zè duto roba vecia che ormai nissun più canta !”

Cussì, ciapai i CD e i spartiti musicali  
duto fracao e serao 'nt' un scatolon sarà  
e, dopo un do preghiere e un ato de dolore,  
de sora i scriverà: “ qui giace “Gravo mòre”...

\* \* \*



*Storie de Gravo*

*canzoni di Aldo Cognon*

## “ Quatro casete ”

*Quanta zente vièn de fora,  
zo pe' quel longo stradon,  
e ai sovi oci che apare?  
'sta maravegia su'l mar :  
“quatro casete de piera  
e garghe cason” !*

*Mar più profondo de'l sielo,  
duto risplende de sol,  
vele e corcai bianchi in volo,  
el paradiso 'l xe quà :  
“quatro casete de piera  
e garghe cason” !*

*'L reparo, 'l vial e la scuriera;  
xe 'l Banco D'Orio  
co' de oro 'l sabion.*

*Drento a le cale più strete,  
a l' onbra de'l campanil,  
la Cesa, sita, in preghiera,  
'l anzolo 'l vègia la sù :  
“quatro casete de piera  
e garghe cason” !*

*Su 'sta laguna che 'ncanta  
la luna la splende :  
par propio un “depliànt”!*

*Per questa zente de fora  
(de duto 'l mondo la vièn)  
cese e mosaici xe storia  
de antica gloria su'l mar :  
“quatro casete de piera  
e garghe cason” !*

*Inte' un canton un vecio, sito, 'l osserva,  
el fà un sorriso e pùo 'l dise :  
“ Xe duta ilusion ! “  
ilusion, duta ilusion,....*

**“ Robarè....(dute le stele) “**

Robarè dute le stele,  
le più grande, le più bele,  
e anche l'ultime più sconte  
in fondo 'l sielo.  
Scondarè anche la luna  
e i so' raji e 'sta laguna:  
questa note me la vògio  
la sia solo per tu.

Robarè dute le stele  
e le rose, le più bele,  
e anche 'l alba ciara  
e 'l sol de la matina.  
Scondarè ogni soriso,  
'l alegria de ogni viso,  
perchè duto 'l universo  
'l vardì solo tu.

Ma 'sti oci ch'è davanti,  
frìdi più de do diamanti,  
che i xe scuri e fundi forse  
più de questo nostro mar.  
'Ste parole che me liga  
e che a capìle 'l fà fadiga  
questo cuor, che tu lo sà,  
'l xe 'namorao de tu.

Portarè indrio le stele,  
dute quante, le più bele  
e 'sto sielo, ch'è robao  
co' la so' luna.  
Portarè indrio i miei sogni,  
le ilusion de i nostri zurni,  
per un oltro cuor che forsi  
el volarà 'sto amor.

Perchè t'è paura e  
no tu vòl sognâ ?  
partì, 'ndà lontan,  
fà 'l to' cuor svolâ.  
'Che vive 'sta vita  
ligai de la realtà,  
i sogni e le ilusion  
'l tempo el sperdarà:  
ma robarè dute le stele  
e duto 'l mondo per tu!

Robarè dute le stele,  
le più grande, le più bele....

## **“ ‘L isola inte’l cuor “**

*Scrito xe su libri antichi  
de un paese in meso ‘l mar,  
vecie piere e antichi riti,  
tanta storia e tradission.  
Zente forte, zente orgogliosa,  
mai paura de nissùn:  
quante storie xe passae  
soto ‘sta luna che muta la stà.*

*Torna inverno e torna istae,  
le stazon no ganbia mai.  
Gravo serva de’l so’ mar,  
zente fiera, maledeta;  
zente ormai che xe sparìa,  
ingrumagia int’un canton  
comò scusse su la spiaggia  
che ‘l siroco ‘l sburta e ‘l ghetta su.*

*Gravo vive, Gravo sogna:  
cavo alto e mai vergogna.  
Gravo antica, Gravo robagia,  
malvolua e despressagia.  
E la luna la varda e tase  
‘sto paese senza pase:  
e la storia se ripete ‘ncora  
e ‘ncora, e mai la finirà.*

*Quanti zuvini sposai,  
quanti visi ‘smentegai:  
storie vecie e vite nove,  
senpre quele, ‘reditae.  
Per ‘sto toco de laguna  
el so’ tenpo ormai xe ‘ndao:  
‘ncora un vecio pescaor che  
resta e dopo duto finirà.*

*De questo porto bisogna parfì,  
pe’ oltri mari lontan navegâ;  
cognòsse ‘l mondo e nove çitae,  
ma senpre a Gravo tornâ ‘ndrio perchè:  
vêmo ‘sta isola inte’l cuor,  
vêmo ‘sta isola inte’l cuor....*

*“ Mar de silensio “*

Anche ‘stasera sòn perso ‘nte’l mar  
de la gnò solitàe ...  
I gno pensieri i vâ in serca de tu,  
de tu ormai ‘ndagia via.

Solo silensio ‘ntorno de me,  
e ‘l mar che ormai za ‘l dorme  
insieme a dute le stele la sù,  
sbociàe comò le rose ...  
sbociàe comò le rose...

Drento ‘sto çielo più scuro de ‘l blù  
me pâr de vèghe ‘l to’ viso,  
quii tovi oci comò diamanti  
e anche ‘l tovo sorìso.

E ‘l cuor me dize de navegà,  
issà la vela granda,  
de velisà in ‘sto mar de silensio e  
sercà quel che me manca ...  
sercà quell che me manca ...

Xe questa vita senza de tu  
che m’à cavào anche ‘l anema.  
Xe comò ‘vè un cortelo ‘nte’l cuor,  
una ferìa che sanguena.  
Xe comò ‘vè un cortelo ‘nte’l cuor,  
una ferìa che sanguena.

Anche ‘stasera sòn perso ‘nte’l mar  
de la gnò solitàe,  
e ‘l cuor me dize de navegà,  
in ‘sto mar de silensio ...

**“ Fine de ‘n amor “**

*Che fredo xe stasera, caligo che vièn su,  
xe grisa la scorièra e scuro anche in palù;  
‘sta vose che me sìga forte drento ‘l cuor:  
la fine de ‘na storia e de ‘n amor.*

*E vâgo torziolando, no hê strada o diression,  
vela lascàgia a ‘l vento, barca senza timon;  
la note scura e muta la me portarà  
verso ‘l unica stela: e tu son tu.*

*Zurni d’istae su ‘l coldo sabion,  
sguardi in silensio e i oci inte ‘l mar;  
basi robai, co’ le stele a vardâ,  
ragi de luna su la pele e tremâ.*

*La testa hê che me scòpia e no capisso che  
volè ‘ndâ contro vento mai più no ‘rivarè:  
la riva se ‘lontana via senpre de più  
e ‘l porto che bramevo perdarè.*

*Zurni d’istae sul coldo sabion,  
sguardi in silensio co’ i oci inte ‘l mar;  
basi robai, co’ le stele a vardâ,  
ragi de luna su la pele e tremâ.*

*Che fredo xe stasera, caligo che vièn su,  
xe grisa la scorièra e scuro anche in palù;  
‘sta vose che me sìga forte drento ‘l cuor:  
la fine de ‘na storia e del gno amor.*



**“ Cartulina de ‘na volta “**

*Gravo disegnagia,  
cartulina de ‘na volta:  
“Grand Hotel Fonzari”,  
“Adria” e “Metropole”.  
Gravo, duta coloragia,  
co’ le vele grande in spiaggia  
e le tende che fiurisse  
su’l sabion.*

*Gravo inamoragia:  
i murusi de ‘na volta  
che i se varda, sìti,  
man intè la man.  
Gravo pituragia,  
mìle fiuri xe in laguna,  
motoscafi i v`a a Barbana  
su e zò.*

*Mamuli che i zoga  
Co’l segelo e la paleta  
e intanto “i siuri” i dorme,  
soto i ombrelòn.*

*I turisti i ‘riva  
co’i vestiti de gran gala  
e la sera duti al  
“GRANDE BALLO” i v`a.*

*E passa ‘sti ani,  
ma tu resti più bela:  
‘l sol te basa ‘ncora,  
‘l vento te ‘caressa,  
i nuoli a torzio i v`a.  
Quel tovo incanto’l resta  
e mai svelâ ‘l segreto  
nissùn no savarà:  
sarà ‘sto mar?  
sarà ‘sto sielo?  
....o questa zente  
de Gravo !!!*

*Gravo ‘ndormensàgia,  
co’ ‘sta luna ‘narzentàgia:  
bona note a duti quanti  
e sogni d’or.....*

## “ W i graisani ! “

“W i graisani !” graisani vèri, nati a Gravo;  
graisani patòchi, quì de “stralonga” o “cul de muro”.  
“W i graisani !” quì de laguna e de boreto,  
graisani “DOC”! che ‘i sà de odor de marinasso.  
“W i graisani !” ‘viva i graisani in canotiera;  
quì che l’istae i vè a ciapâ ‘l sol in scuriera.  
“W i graisani !” ‘viva i graisani in ostarìa,  
che cò i xe duri, vè le muger a portàli via !

Graisani ! ‘viva i graisani,  
‘viva i graisani, ‘viva ‘sto mar  
e ‘viva Gravo !

“W i graisani !” che vè de pension,  
che no ‘i lavora o i vè de stagion.  
“W i graisani !” quì che d’ istae i ‘fita,  
che a lugio e agosto i vè a durmî in sufita.  
“W i graisani !” graisani in giro per ‘l mondo,  
che cò i xe stufi i torna a Gravo co’l “Mercedes”.  
“W i graisani !” co’l conto in banca e che i xe siuri,  
carghi de soldi, sia botegheri o pescauri !

Graisani ! ‘viva i graisani,  
‘viva i graisani, ‘viva ‘sto mar  
e ‘viva Gravo !

“W i graisani !” ‘viva i graisani anche inbrugiùni,  
che i frega duti e dopo i v`a in confessional.  
“W i graisani !” rosario e borsa de la spesa,  
graisani bigoti, qu`i che v`a v`inti volte in cesa.  
“W i graisani !” ‘viva i graisani a muso duro,  
graisani astiusi, senpre ‘rabiai col mondo intiero.  
“W i graisani !” graisani che i te da ‘na man,  
che i gi`uta duti, buni com`o un toco de pan !

Graisani ! ‘viva i graisani,  
‘viva i graisani, ‘viva ‘sto mar  
e ‘viva Gravo !

“W i graisani !” e ‘viva anche me,  
che s`on graisan !!!

“Aleghe de mar”

*Xe comò 'l treno  
su 'na ferovia  
'sto sirocal,  
che duto 'l porta via.  
Drento la testa  
hè miera de restìe,  
miera de trini che  
i còre a sento a 'l ora;  
mìle vaguni  
co' mìle e più pensieri,  
forsi ilusion  
o forse sogni vîri.*

*Nuoli che còre,  
el sielo quasi nero,  
l'aria xe scura  
la pesa comò 'l pionbo.  
Sora 'l sabion,  
in meso a mìle scusse,  
'na strica scura:  
xe aleghe de mar.  
Tochi de vita  
portai de la corente,  
vite strassae:  
le storie de 'sta zente!*

*Aleghe de mar,  
aleghe de mar  
ghitae su 'sta spiaggia,  
de 'sta vita che xe  
comò un sirocal.  
Sêmo àleghe de mar,  
àleghe de mar  
che 'l destin l'à 'ngrumao  
e no esiste  
un perchè!*

*I nuoli i càge  
e 'l sielo 'l se rebalta,  
su le restie che còre  
su 'sto mar.  
Mar comò un prao  
co' i sovi mìle fiuri,  
miera de àneme  
che 'l tempo l'à fermao.  
Quando 'sto zorno,  
doman, 'l sarà finîo,  
restarà solo quel  
che volarà Dio!*

## **“ Gravo xe questa “**

Gravo se svègia comò ogni matina  
co' raggi de sol sora i cupi e le cale,  
bava liziera che mòve le fronde,  
i pescauri i xe za su le onde:  
ancòra un zorno cussì 'l scuminsiarà,  
Gravo xe questa, la so' vita che v`à...

Xe comò un fior che 'l se vèrte cô l' alba,  
roba a sugà e gerani fora 'i barcuni,  
mile culuri drento cale e canpieli  
e fantulini che pianze, co'i mussi:  
ancòra un zorno cussì 'l scuminsiarà,  
Gravo xe questa, la so' vita che v`à...

Xe 'l anzolo biondo, là, sòra de 'l canpanil,  
che 'l varda e 'l protège la zente de questa çità,  
e 'ste vecie piere, che drento le à n' anema,  
le pòl contà storie che ormai nissùn no' sà.

Vèrte i negossi, i squeri 'i lavora,  
femene svelte le v`a a fà la spesa,  
voze de mamuli che 'i còre a scuola,  
un son de canpane, gargun che v`a in Ciesa:  
ancòra un zorno cussì 'l scuminsiarà,  
Gravo xe questa, la so' vita che v`à...

Gravo se svègia comò ogni matina  
co' raggi de sol sora i cupi e le cale,  
bava liziera che mòve le fronde,  
i pescauri i xe za su le onde:  
ancòra un zorno cussì 'l scuminsiarà,  
Gravo xe questa, la so' vita che v`à...  
Gravo xe questa, la so' vita che v`à...

“ La strada che va’ “

*Forsi più longa de’l tempo  
‘sta vita sarà;  
miera de stele che segna  
la strada che và:  
sogni che ‘i còre lontani,  
oci che ‘i brìla za strani,  
cuori che ‘i fà de riciamo  
a la felissità.*

*Lenta la vita la score,  
‘che fuga no’l à;  
pian passa i zurni e le ore  
su questa çità:  
zente che à l’anema ciara,  
note diventa matina,  
quel che nissun indovina  
sigriti no à!*

*Arte calae,  
quante noti ghitae  
a tormentasse pe’  
sora ‘sto mar.  
A casa mai,  
via col scuro e i ferai:  
la fadiga che la  
strenze ‘l cuor.  
E cô torna’l istae,  
sol fin drento de’i ossi,  
oci pìni de mar  
e de nuoli che và.*

## " Gravo "

*' Ndola che 'l aqua dolse la se fà amara  
zè quatro dossi de sabion, fango e caneo,  
ma duto 'ntorno mar e un sielo biavo  
co' nuoli bianchi sparnissài che vâga a torzio  
e in meso 'l verde e 'l sbrufò de le cane  
una caressa fresca: bava lisiera ...*

*El sol no 'l se sparagna de 'ste parte,  
'che 'l bàte drito e forte: 'na brusera ...  
ma quando 'l fogo de 'l tramonto 'l se destua  
alora duto se queta, se riposa,  
e i raggi ciari de la lume che zè in sielo  
i 'lumina 'sto fior pusao su 'l mar.*

\*\*\*\*\*

“ STORIE DE GRAVO “

*Storie de Gravo che ‘l mar  
el sà a memoria,  
che ‘l scrive e ‘l riscrive  
ogni zorno sora ‘l sabion.*

*Storie de vite che ‘l tempo  
‘l consuma e ‘l scansèla,  
che ‘l fonda e ‘l rebalta  
comò che fà ‘l sirocal.*

*Storie de Gravo che ‘l mar  
el sà a memoria...*





A.Tognon @ Copyright